



Juryrapport oeuvrepries 2024: Minsekinder

Det Minsekinder al vuuele jaore ein groeëte ster aan 't Limburgse leedjesfirmament is, det wet idderein. 't Ensemble, det besteit oet vief zier muzikale leje, haet in 1989 veur 't iers 't daagleech gezeen, en det beteikent dus det we kinne spraeke van (weer ein) jubileum: 35 jaor gaeve zeej al acte de présence op de diverse Bühnes in en ouk boete ós provincie, en zelfs zoeë noow en dan boete ós land.

Minsekinder is óntstaon in einen tied det 't in 't Venlose neet zeldzaam waas det d'r bandjes ware die in 't dialek zóng. Zoeë hadde we Romeo, Moder Hellup, en ouk de Drekskaters, die vurrig jaor d'n oeuvrepries hebbe gekrege, en die dit genre eigelik min of mier groeët hebbe gemak. Zeej ware de waegveurbereiders veur ein genre det noow neet mier weg is te dinke. In daen tied zoot de wind mei, en Minsekinder haet dao ten volste van geprofiteerd. Waat begós met ein mingsel van eige leedjes, flotte covers en vastelaovesleedjes die in ein 2.0-versie woorte gebrach, is oetgegreujd tot ein band die d'r um bekind steit det zeej èn nog steeds en steeds mier eur eige leedjes bringk èn ouk nog steeds, en eure naam verplich 't örges ouk, vastelaovesleedjes speult die in ein niej jeske zien gestaoke.

Dao wao MK op de Bühne of in de kefee steit, dao is 't fees: of det noow is op de vastelaoveszaoterdaag, örges in ein klein kefee midde in de zomer op de Heutsstraot, op de Parkfeeste, veur 't Stadhoes, op ein vief jääorige broelof, op euren eige Limboot of in Krefeld is: euveral wuurt **gedans wie dansmeriekes**, gezóng met **ein letste glaas tequilla**, gek gedaon wie in de **Casa Loco**, gezwijmeld in **twieë diepblauwe ouge**, gedach aan daen tied van **Och waas ik maar**, genaote van 't **Veurjaor**, geschrieewd wie naogeaete door einen opgestoekden hónd oet **d'n Hacienda**, gekeke nao **die Ster aan d'n hemel, An** (oet 1936!) wuurt d'r nog ens beejgehaold um te vraoge wie 't nog met Sjan geit, kortum: Stimmung **oet 't Zuje** is gegarandeerd, **lekker zunke** of gen lekker zunke!

Det 't neet allein maar geit um wilde feeste hebbe zeej ouk beweze met alde klassiekers, die zeej neet ónmiddelk in ein wild ritme hebbe gepers: sóms is ein traog tempo ouk oeërzaak van moeëje, vaste en romantische denskes waobeej ouk waal ens nostalgie baove kump drieve. Of werme geveules. Wae wet zien d'r

al diverse trouwerieje óntstaon die zien begós naodet twieë geleefde zich deep in eur deepblauwe ouge hebbe gekeke tiedes einen dans op de zeute toeëne van ós laureate.

Um dan nog maar te zwiege euver eur duette met o.a. Beppie en Ben Verdellen. En uiteraard euver 't weer op de Bühne en op ein voetstök plaatse van Sjraar Peetjens: det allein waas ein suuksesnummer wao 't Venlose en 't Limburgse publiek immens genaote haet. Al dees samewerkinge hebbe moeëje kruutsbestuvinge opgeleverd.

Det zeej daobeej, óngemerkt maar toch waal hiel erg bewus, aan promotie van ós moeëje dialek doon, det hoof ouk gaar gen betoog, en is veur eur mier beejsaak en vanzelfsprekendheid as det 't bizónder is. Minsekinder bewies det se um moeëje en geveulige leedjes te make gaar neet truuk hoofs te valle op d'n Ingelse of de Nederlandse taal, maar det 't dialek zich prima lieënt veur 't oetdrökke van de allermoeëjste en allerzuverste gedachte en det 't ein repertoire opgeleverd haet wao minnig band, of det noow in binne- of boeteland is, zich ein puntje aan kint zuge.

As se 't as band dan ouk nog ens 35 jaor (en we zien haopelik nog lang neet oetgeteld) volhils met dit kónsep, dan kin det oeteindelik allein maar leide tot ein depe buiging van ós allemaol.


Daorum is 't Veldeke Limburg ein groeëte ier um de Veldeke oeuvrepries 2024 oet te reike aan Venloos trots, de band wao ze in Venlo en hiele wieje umstreke allemaol gruuets op zien, en waovan weej haope det dezen oeuvrepries aanleiding is um nog hiel erg lang door te gaon met wao geej good in ziet: meziek make, in al de facette die baovestaond aangestip zien gewaore, in ós moeëje Venlose taal!

Van herte perfietsia!

Names Veldeke Limburg



Drs Reg van Loo
veurzitter



Thijs Peeters
secretaris

